

奏疏存藁卷之五

目次

題報校誠川弁復首僞諭疏

建昌官兵堅志守城疏

遵奉 上諭回奏情由疏

報明收集官兵疏

請寬營弁以收後効疏

題請實授要鎮疏

成都起行進勦日期疏



報明統兵前赴嘉眉先滅重賊疏

報明三路進兵夾勦逆賊疏

奉遣官兵疑畏不前擒拏正法疏

題報建昌官兵自行撤出疏

協勦官兵屢敗逆賊克捷疏

報明官兵無糧撤出銅河疏

攻克關山象嶺捷報疏

報明官兵渡江前進疏

督率渡河官兵先行進勦疏

再復建昌捷報疏

懇請另簡督臣疏

題報身到建昌遣發官兵疏

親身督兵先進大衆候糧疏

報明入滇日期疏

奏疏存彙卷之五

題報投誠川弁復首僞諭疏

題爲再報投誠川弁復首僞諭始終堅貞仰祈

睿鑒勅議加恩鼓勵人心事康熙十九年十月十三

日據領兵總兵官李芳述鄒九疇等稟報內稱

有原僞昭勇將軍標戎旗遊擊補僞夔州援勦

副將沈明龍前於川東投誠在合江爲民今復

投入胡國柱下於本月初七日巳時分帶領塘

馬數百撒至城下對河大聲喊叫有文書在此

就放在河邊石上轉去職等與同城文武眼同
差人過河取來係逆渠胡國柱與職等僞諭一
紙其間詞語狂悖無非陳其利害計圖聳動官
兵職等既經歸正身受

國恩又蒙本將軍部院推心置腹多方體恤惟有
誓死以報

朝廷敢存異念是以職等前具稟懇將衆官兵家口
移往嘉定崇慶州安插一以就食一以斷絕官
兵兩持之心卽今逆賊蜂擁蟻聚滿洲大兵自

南溪退回竟去瀘州不顧敘府職等所統官兵
并顧副將所統官兵無不人人極力願守孤城
但賊勢日重職等兵單仍懇本將軍部院移文
衆位滿洲將軍就近迅發大兵前來庶救危急
所有僞諭理合封投電覽等情又據署左營遊
擊事前營守備顧隆密稟內稱滿漢大兵自南
溪過渡退往瀘州而敘府投誠官兵與前大不
相同人人俱懷疑懼似有兩持之心所有前議
起發官兵家口赴嘉定崇慶州今竟不肯動

移之情若非總兵李芳述堅心立意暗令卑職等官兵披甲并彼督率親信官兵傳諭若有遲疑不令家口出城拏來斬首幾有不可言問之變卽今於城頭嚴加設備復於城外山上修築營盤打梅花樁挑挖壕塹以期內外固守且逆賊臨城隔河或持逆書或執將軍印劄百般引誘李總兵卽大聲叫罵架使鎗砲擊打於是人心方定等語十五日又據嘉定偵探守備王國興報稱有敘府投誠總兵李芳述等官兵家口

陸續到嘉定婦女多係步行人衆甚是苦累必須急爲安插等情到臣該臣看得總兵李芳述自率衆歸誠之後抗拒僞命舉首逆書且前遣發永寧大破勁敵殺敗王邦圖等逆宣力國家可謂投誠川弁中之矯矯者臣屢疏奏請已荷

皇仁授爲總兵頒給部劄嗣因瀘州失守逆渠胡國柱差人餌誘又復擒綁奸細出首僞諭逆書亦經臣具疏

題報請

旨議敘再永寧復陷滿漢大兵俱退仍復過江竟去瀘州不顧敘府而敘府又在大江之南該總兵不獨堅貞不渝矢志効忠抑且才智膽勇可嘉如請移家口以杜官兵疑二之心賊臨城下不爲利害衆寡搖惑臣再四思維蜀地依山環水人民强悍素稱難治平川首在得人之心如李芳述者乃川將中之翹楚投誠中之傑出者也臣叩懇

聖明授以實缺總兵隨臣平定川蜀進征雲南可期克効查黔省各鎮已奉

俞旨推補有人而滇省舊有永順蒙景廣羅曲尋四鎮合無將李芳述准補一鎮一以嘉其忠貞以收實効一以大示激勸用勵將來至鄒九疇已遵

旨擬爲領兵總兵官然尚未授給部劄而蔣榮德瞿洪陞俱出一事同心之人亦當加

恩使其合力報効均當授以總兵官准給兵部劄付

隨征進勦至各官兵家口徒步跋涉前來深爲可憫臣

請照順治十七年滇省投誠官兵事例無論家口多寡每一兵准家口糧一分每月給米三斗以示皇仁以便安插除送到僞諭咨移兵部外臣因急在收拾人心恢疆滅賊起見相應具

題伏乞

皇上睿鑒全覽

勅議施行

建昌官兵堅志守城疏

密題爲報明建昌官兵情形仰慰

聖懷事竊照鎮臣朱衣客退兵狼狽以致兵心渙散險要不守縱賊竟渡瀘河直過大象嶺小關山幾薄雅州臣遣總兵偏圖趙弘燦等統兵前去堵禦前疏具

題報明在案矣而大路險要俱爲逆賊所踞建昌阻隔千里聲息不通雖遙度守城官兵五千中多係寧夏標營前鋒勁旅必不肯輕易棄城料

在堅守然恐日久未知成都之信人心搖動事
又難期臣一面遍發密諭重其賞賚令附近苗
蠻地方邊汛官兵及土官等前去通信令其堅
心固守以待大兵一面整頓官兵正擬破賊接
應間於本年十一月初十日建昌鎮將公差鎮
標中軍遊擊劉登賢等至成都稟稱自九月初
六日朱總兵退兵之後建昌官兵堅守孤城四
十餘日逆賊屢來攻圍我兵出戰尚有擒斬卽
逆字僞書屢來煽惑各官兵心志愈堅皆齊集

神前鳴誓効死以報

朝廷凡有奸細及差來之人當卽擒斬一切逆書一
槩不看盡皆投火焚燬以絕小人猜疑之心惟
是馬打滾禮州兵退四下苗蠻俱叛爲賊處處
把截道路不通各鎮將復赴神前誓心議令卑
職帶各鎮營挑選善走膽勇步兵鎗手三百名
舍死忘生從野蠻地方尋路而來自十月十八
日自建昌起身沿途多係大山懸崖冰雪難行
林木深厚官兵俱是步走攀藤附葛砍伐樹木

而行到處苗蠻截路卑職等官兵總不敢稍停
無分晝夜艱辛前來行至馬邊地方已屬內地
兵丁疲乏已極俱緩行休息在後卑職自峩眉
縣騎驛馬前來等語再閱該鎮將等印文內開
建昌鎮道副叅遊都守千把并在建領兵各官
王進才傅作楫藍兆周胡振雄呂自魁馮德昌
鄭有榮溫光顯陳世虎俞之江馬聲雷李洪李
一虎馬進務杜呈源倪進朝王進忠穆應魁李
見龍王標魏慶等連名稟報爲孤城被困日久

萬分危急速請援兵飛救事竊自九月初六日
自馬打滾朱總兵退兵竟回賊勢漸狂止遣建
昌一城官兵死守其危急困守情形屢具塘報
僱覓苗蠻從蠻地轉送成都不知中途被賊阻
梗抑有別情不曾投到經今四十餘日未見成
都信息城中官兵心志雖堅但強敵在外訛言
難聽誠恐久而生變惟望大兵蚤渡瀘江庶孤
城不致危陷不盡情形俱囑遊擊劉登賢口稟
等情到臣該臣看得建昌逼近雲南爲賊所必

奏疏存彙 卷之五 七
爭自恢復之後逆賊旋即出犯臣陸續遣發官兵申嚴再四與賊對壘鏖戰七箇月兵鋒曾未少挫逮瀘州失守人心疑二而庸鎮接踵退兵又復狼狽之甚竟置數千官兵隔別於不可問之地臣心如焚寢食俱廢今仰仗我

皇上天威官兵矢志堅守孤城而救援之兵難容緩待但胡國柱等賊扎乾溪七星山等處距敘府二十里劉起龍等賊踞大象嶺小關山一帶守險現在會兵破肘腋之賊朱衣客奔散之兵數

多已遣員分頭堵截現在收集安插除內顧之患均俟微臣會同將軍臣俄克濟哈極力佈置另疏題

請而建昌望信緊急臣選差隨征總兵毛正義都司劉成千總毛成虎王朝幹王恩榮等帶精壯步兵五百名同劉登賢原帶之兵仍從原路前去建昌諭令官兵安心固守以待大兵又慮生苗野蠻不覩

王化中途作梗臣宣布

皇仁傳牌撫諭更備紬布銀牌令其隨處賞賚以通
道路并重賞劉登賢前來官兵暨毛正義再造
官兵訖所有建昌官兵守城情形相應具題

上聞仰慰

聖懷伏乞

皇上睿鑒全覽施行康熙十九年十一月二十九日
奉

旨兵部議奏

遵奉 上諭回奏情由疏

密奏爲微臣欽奉

上諭謹敘明回奏情由仰祈

睿鑒事康熙十九年十一月初二日科臣摩羅部臣
陶莫和口傳

上諭諭將軍趙良棟凡爲將者同心合意爲國勤勞
而不離間方可平定地方勦滅賊寇矣朕近聞得
爾等皆爲彼此意不相從俱是不和若各持其意
不但於事無益而朕篤賴之意皆虛矣自此以後

應當同心合意平定地方勦滅賊寇可也欽此臣
跪聽之下不勝惶悚當卽叩頭謝

恩訖念臣庸愚武夫孤子漢人不能規正將軍臣吳
丹瀘州失守永寧復陷皆出臣之才力不逮庸
鎮朱衣客接踵退兵建昌隔別此又臣之任使
不明我

皇上不卽加處分

溫綸戒飭仰見

聖明浩蕩寬仁臣復何言然封疆事大

上命爲重臣又不容不言謹簡畧

奏明仰懇

睿照查進取漢南克平川蜀乃臣首倡具疏急急滅
賊蚤定雲南以終其事出臣切願滿洲勲舊

朝廷心膂近臣而臣豈不自揣豈不敬畏又豈不樂
與和衷而臣不得已之苦心忠勤自矢孤掌難
鳴諒我

皇上蚤已洞照矣至湖廣緩兵不進以致重賊俱來
四川吳丹係

題定一路將軍私心弄巧不肯嚴防汛守不待進兵之期失陷應進之路所指之地難逃

聖明電察如雲南爲賊老家四川爲賊門戶出必爭必守之地我當須重兵嚴防川人强悍土司苗蠻以及投誠人等依山恃水心難期料而且地方荒殘州縣無城不比陝西首在收拾民心建昌恢復之後逆賊劉起龍等旋即出犯與官兵對壘惡戰死守且離雲南爲近距成都甚遠深爲可慮必須重兵扼守永寧出犯之賊雖經殺

敗然退去畢節尚在窺伺是二處最爲緊要副都統覺和托官兵自重慶就近留瀘州養馬不必又來成都原進川東一路官兵惟奮威將軍標五千官兵中有二三千勁卒應調王用予永寧駐防四川雲貴非山卽水前導必須漢兵步人多用鎗砲興安總兵程福亮在南山征勦日久深明步戰以及山水道路可調來用爲永寧一路前部湖廣官兵旣到沅州直進貴陽坦坦大道請

勅湖廣官兵急急進取貴陽而貴陽相距遵義四小站平路賊自奔退我們兩路只要嚴防汛守以待進兵不必拉扯遵義否則未有舍對壘窺伺之賊撤要汛之兵遠去他圖之理况水西祿氏安勝祖阿烏等與逆賊讎殺兩年今既差人前來投誠願爲內應大定威寧僞副將王嘉祿蕭鳴鳳亦已具稟投誠機會可乘鹽井僞將軍海潮龍亦在投誠迤西俱應兩路俱有機會朝廷洪福事期八九惟是逆賊退無可退之地勢必

拚命死戰我之進兵在八月終恐狡賊之乘間出犯未必靜待至八月終也若我嚴謹汛守賊來何害倘偷安踈懈一有不利事關不小且漢兵不比滿洲要好官操練要緊慎鈐束猶如玩鷹鷂一般用的當應心應手稍有差錯只是飛走叫不回頭將軍不要厭聽四川不比陝西不可兒戲此臣自三月會議言起不啻舌敝將軍臣吳丹不聽後馬寶封蜀王來遵義永寧瀘州更覺緊要復請調王用予官兵赴瀘州直至破

面不聽及仁懷合江已失瀘州告急請兵之文
報於七月二十九日到成都臣等正在郊外接
旨衆議說調王用予官兵已是遲了恐不濟事滿洲
馬匹已肥請速發一千限以時日星馳瀘州防
護又不聽查瀘州失守在八月初十日若肯八
月初一日發兵初七初八可到則瀘州無事矣
及瀘州失陷全川震動人心洵洵臣何敢以吳
丹偏執誤事不以封疆爲重置而不管臣卽言
賊勢愈重賊膽愈大不便輕敵當急急調王用

予官兵兩位滿洲將軍留一位同督撫守成都
我亦前去並力破賊只是吳將軍將瀘州官兵
不守速速

題明又王用予無權難以束兵我們大家上本公
保他行提督事總爲鈐束漢兵鼓勵他破賊吉
孫畧老練夙將膽勇過人我知之最切大家公
題他承寧總兵着他星馳前去協同守城將軍
督撫咸稱臣公心公論極是我們心服而將軍
臣吳丹半吞半吐仍不聽不用至瀘州賊旣騰

空不守以空城餌我明係分兵之計不必爲賊所愚請速去急救永寧破重賊爲上策臣又復差人持書并文前去不但不聽反厲叱其差回文大有不然再永寧一路用秦糧出公議

題明之後又復弄巧兩路漢兵用四萬出公議乃題疏參差以致誤事奉

旨着去重慶不去重慶而來成都情願認走永寧一路及其

題明奉

旨又不切實防汛東拉西扯以致誤事進兵日行十餘里現有王用予通詳竊思臣與將軍臣吳丹同一將軍各分一路滿漢官兵分定有數應進之路應防之汛各有所指調遣分佈各有專責原不當言然

朝廷封疆爲重且恐一路失利兩路掣肘是臣又不得不言言之不聽亦處於無奈何已若夫微臣敢有兩視之心必不肯舍建昌緊急不救將臣一路滿洲大兵俱發去瀘州又分漢兵顧敘府

守成都爲兩路聲勢設懷心不睦又豈肯苦口
盡言招忌招怨此臣一腔忠赤入川以來之苦
心苦口或諸臣忌臣恨臣者有之而臣未有不
敬吳丹不親吳丹不願與其和好者原委冗長
始末語繁不敢備敘入疏俱面陳於科臣摩羅
等代臣啟

奏再思科臣等以

密旨諭臣而臣以密奏單入科臣之耳恐科臣等難
以微臣一面之言爲至公是臣又不得不將始

末情節當同將軍臣俄克濟哈督臣楊茂勳撫
臣杭愛叅贊臣佛尼勒等跪

奏於科臣部臣之前指爲証據想二臣還

闕復

命代臣面奏之下自是仰邀

聖明睿察而臣孤忠報

國召忌招怨之魂夢始安矣所有兩路官兵渙散
兩路逆賊鴟張大費心力大費振刷臣敢不勉
竭駑鈍盡瘁効忠容臣會同將軍臣俄克濟哈

極力佈置另疏請

旨外緣係敘明回奏情由貼黃難盡伏乞
皇上聖慈原鑒臣不勝悚切待

命之至謹密具奏

聞康熙十九年十二月初五日奉

旨議政王貝勒大臣會議具奏

報明收集官兵疏

密題爲報明收集過奔散官兵現在缺額數目急
爲整練并請開除以肅軍紀以利進勦事竊照
西寧總兵朱衣客官兵大散據報由小路適青
川奔逃臣遣發官兵分頭堵截收集業已

題明在案今據臣標中軍叅將胡攀桂西寧鎮標
遊擊署成都副將事屠存義暨分遣各官王國
臣等報稱共收集過西寧鎮馬步官兵四千四
百二十九名遵照憲牌將上堪克兵者二千三

百五十名交遊擊趙元輔孫國祥管領留在雅州協同各鎮營官兵堵勦卑職等帶回兵二千七十九名內傷病者六百五十名全無器械不堪者一千四百二十九名等情到臣臣查原在天王廟馬打滾禮州盧沽峽四處官兵八千九百九十名內除撫遠大將軍標總兵王好文官兵五百五十名趙名友官兵二百四十五名靖寇將軍標遊擊柴英官兵三百名陝西督撫把總杜勳官兵二百名畧陽營守備葉自昌官兵

四百名畧陽投誠叅將郝俊龍等官兵三百一十名成都投誠總兵段登仕等官兵五百名七營共官兵二千五百零五名其六千四百八十五名俱係西寧鎮總兵朱衣客管轄之兵也茲據回報收集過西寧鎮官兵四千四百二十九名尙少西寧鎮官兵二千零五十六名或係傷亡或係奔逃或係別有差遣應聽朱衣客并原領將弁細開報部并報陝西總督衙門核查但原調入川進勦建昌一路西寧鎮官兵八千名

今報少兵二千名帶回傷病不堪二千名又原在成都患病八百名楊三虎帶去永寧署事二百名是不獨九千官兵退回渙散驟難爲用而西寧一鎮官兵八千缺數以及不堪用者卽有五千人矣當此逆賊拒險守要進勦急須兵力豈堪若是踈悞此臣不得不勉竭心力急爲振刷以利前驅除留雅州尙堪克兵者申明紀律責令該管急急領餉收拾衣裝什物速爲整頓以備進勦而帶回成都者嚴限官弁極力整練其

狼狽不堪以及傷病殘廢共計六百名在川徒糜糧餉應發回陝西另爲招募并缺數請其撥補但臣急在攻險破賊此項撥補官兵遠不應急除臣行令各官分晰造冊移咨陝西督臣哈占并報撫遠大將軍查照兵數撥補前來繼臣兵後以爲接應再咨明四川撫臣杭愛清查糧餉外所有微臣分遣官兵收集過奔散之衆分派嚴限整練并請發回不堪及缺數急爲撥補相應據實

題報貼黃難盡伏乞

皇上睿鑒全覽

勅議施行

請寬營弁以收後効疏

密題爲庸鎮已蒙

勅究營弁百員現在進勦不便槩爲質審仰懇

聖明法外施仁以安衆心以收後効事竊照總兵朱

衣客於馬打滾禮州退兵竟不守險其間將弁

按以軍律均應指叅但爾時官兵大散逆賊已

過大渡河臣若不稍寬安慰如許將弁必人人

自危不獨不能滅此外賊竊恐內患有不可問

者矣今則事雖稍緩人心稍定然各官弁俱領

兵勦賊出力疆場似不便一槩提審內除王好文有無强行扶掖朱衣客上馬應聽質審楚明俊庸怯無膽現在推病另疏指叅外其餘將弁念在天王廟馬打滾禮州與賊對壘七箇月身經百戰有屢帶重傷尚在奮力者有膽勇破陣擒斬獲功者有退兵殿後保全傷重官兵者有官卑職微兵不多而不能自主者臣叩懇

皇仁槩准

寬赦以期後効至總兵朱衣客身膺封疆重任且提

本鎮本屬官兵六千不能破賊取勝反退兵而奔千里又兼大渡河不守自言自報皆稱不能管兵請回成都等語卽此一端可定其庸怯無能貽悞封疆之罪矣臣因急在進兵首要收拾人心起見應否

寬免伏候

皇上睿裁勅議施行

題請實授要鎮疏

題爲庸鎮怯懦等事康熙十九年十一月十六日
准四川督臣楊茂勳咨開康熙十九年十一月
十三日准兵部密咨內開職方清吏司案呈奉
本部送密封內該本部覆勇畧將軍總督趙良
棟題前事等因康熙十九年十月初六日題本
月二十二日奉

旨據奏朱衣客庸怯輕棄汛守退回大千軍紀着嚴
加議處具奏兵部知道欽此密封到部查定例臨

奏疏存彙 卷之五 三
陣敗遁按以罪之輕重照律治罪等語該臣等
議得將軍總督趙良棟疏稱總兵朱衣客身受
朝廷封疆重任且係旗下舊人擁數千官兵不能克
敵制勝旣退過河推藉於兵不守河口請撤回
成都日中全無

國法伏乞

勅議嚴加處分等因查總兵官朱衣客統領八千官
兵前赴建昌救援不能破賊救援建昌及在天
王廟地方失利不守越嵩衛緊要地方卽過河

退回殊干軍紀應將總兵官朱衣客革職請

勅四川總督楊茂勲嚴提究擬具題俟

命下之日將西寧總兵官員缺臣部另行具題請

旨可也等因康熙十九年十月二十四日題本月二
十七日奉

旨朱衣客着革職嚴提究擬具奏餘依議欽此爲此
令咨貴部院煩爲欽遵查照施行等因備咨到
部院准此爲照總兵朱衣客乃進勦之員現在
領兵駐守雅州必須遴委能員前去署理該鎮

事務將兵馬等項交代接管方可提審擬合移
咨爲此合咨貴將軍部院煩請查照希卽委員
接管朱衣客原領兵馬營務庶便行提審擬并
希示覆施行等因到臣臣隨檄行候補總兵官
偏圖前赴雅州署理西寧鎮事接管兵馬外查
朱衣客官兵大散逆賊已過大渡河現在拒險
守要臣等急在進攻而西寧總兵員缺若候部
推自非旦夕可到况值官兵退奔之候渙散難
用雖經收集整頓然必須膽勇戰將爲之統率

方可振刷查偏圖勇敢之將禦侮之才且係
皇上特拔揀選遇川省雲貴總兵缺出補用之員合
無准其實授西寧鎮總兵官統領所屬官兵隨
臣進勦以收速効實出兩全但應否

允從

聖明自有

睿裁非臣所敢擅必也伏乞

皇上俯鑒勅議施行

成都起行進勦日期疏

題爲報明臣等會商統兵進勦起行日期事竊照
建昌孤城自總兵朱衣客退兵之後已在隔別
而該鎮所統官兵又在大散奔逃臣雖遣發官
兵分頭堵截收集不獨人心渙散驟難爲用抑
且西寧一鎮原調入川八千官兵中缺少以及
傷病卽有大半矣當此急在攻險破賊之際再
請調撥官兵自是遠不應急是臣又不得不整
頓收集之兵設法鼓勵再竭愚忠以期破賊恢

疆仰答

君恩而總兵李芳述等節報胡國柱等逆俱過馬湖
河西來欲與劉起龍等賊會合臣與將軍臣俄
克濟哈將成都所有滿漢官兵統領於十二月
初四日起行前進撲勦俟滅賊之後如何救應
建昌恢取雲南另疏

題報至於省會重地交明撫臣杭愛臣等亦量撥
官兵留守外所有臣等統兵起行日期相應
報明伏乞

皇上睿鑒施行康熙十九年十二月二十日奉
旨兵部知道

報明統兵前赴嘉眉先滅重賊疏

密題爲報明建昌官兵等事康熙十九年十二月十六日准兵部密咨職方清吏司案呈奉本部送密封內該本部覆勇畧將軍雲貴總督趙良棟題前事等因康熙十九年十一月十五日題本月二十九日奉

旨兵部議奏欽此密封到部該臣等議得勇畧將軍雲貴總督趙良棟疏稱建昌官兵矢志堅守孤城而救援之兵難容緩待臣選隨征總兵毛正

義等帶兵五百名前去建昌諭令官兵安心固守以待大兵等因查大將軍貝子等滿洲綠旗大兵恢復貴州鎮遠貴陽等府進定雲南貴州雲南係侵犯四川賊寇後路今逆賊必然振潰應請

勅下在川將軍俄克濟哈佛尼勒趙良棟等乘逆賊振動之際勦滅逆賊速救建昌危困之處會商毋失機會而行至將軍趙良棟將貴州大兵進取雲南四川大兵勦賊前赴建昌救援緣由差

人曉諭建昌所有官兵令其固守地方至將建昌危困救援之日該將軍將建昌文武各官保全城池之處查明具題可也等因康熙十九年十二月初二日題本日奉

旨依議速行欽此爲此合咨貴將軍煩爲欽遵查照施行等因到臣查臣與將軍臣俄克濟哈統領滿漢官兵自成都起行原當前赴邛雅相機攻取關山象嶺敗賊由大渡河急救建昌不期途次新津准將軍臣佛尼勒咨移并總兵李芳述

等塘報暨嘉眉州縣之文屢次報稱胡國柱王緒等逆擁衆二萬有餘驅象六隻下營一十七座從馬湖渡江欲從沐川司出犍爲侵犯嘉定抄敘府之後出銅河犯峩眉通榮經敘府兵單甚爲緊急又峩眉縣稟報沐川司土官已經從賊胡國柱遣賊兵抄截新鎮之路馬邊地方已爲阻梗有本將軍部院遣發毛總兵等官兵現駐青龍場不能前進賊欲出沐川司適銅河來峩眉各等情臣思逆渠胡國柱等以勢窮之殘

寇初乘隙於瀘州再僥倖於永寧遂使逆焰復熾而兩路之賊會合西來必蓄妄念是臣前疏奏明者今狡賊果有此謀臣等若以永寧一路之賊自有永寧一路將軍聽其調遣官兵撲勦防遏臣等各任建昌一路竟去邛雅則恐嘉定犍爲峩眉夾江不保不獨敘府隔絕而成都大有可慮且峩眉直達榮經以通關山象嶺大渡河之賊若兩路狡賊接連於一處賊勢愈重更難剪除臣等再四思維切慮地方總屬

朝廷封疆敢不於緊急中先爲策應耶除臣嚴飭總兵偏圖固守雅州并更調總兵趙弘燦叅將康調元等官兵前來會合共期先破重賊臣等統領滿漢官兵於十二月十二日抵夾江爾時犍爲嘉定峩眉夾江之民俱皆逃遁犍爲道路竟爲阻梗而沐川銅河一帶處處皆賊有報逆賊一股由沐川司出犍爲犯嘉定一股由鳳凰村出銅河來峩眉又報自馬湖適新鎮通建昌又報由中鎮適大渡河臣會同將軍臣俄克濟哈

分遣滿漢官兵於犍爲嘉定峩眉銅河新鎮一帶迎賊遏要接連敘府勦殺沐川司出犯之賊控制馬湖再於洪雅遣發官兵把守使榮經關山之賊不敢東窺一面知會將軍臣佛尼勒調瀘州官兵來敘府協力破賊至於建昌官兵堅守孤城求援甚切臣等旣不敢輕視出犯之賊置嘉眉重地於膜外然亦不敢少緩接應之兵以失衆望如前遣總兵毛正義等官兵旣爲賊阻慮恐兵單復添發總兵王國臣李應魁等共

合漢兵一千員名於太平墩適涼山從蠻地前進再遣漢兵五百尾後撒塘以通聲息并行總兵偏圖馬山整頓印雅滿漢官兵相機於高楊二土司地方抄小路奪取象嶺大渡河曬經關今新鎮銅河之賊俱退又報棄馬湖去豆壩總之逆賊歸無可歸恃山憑水忽東忽西竟成流寇雖曰釜底遊魂滅在旦夕而希圖僥倖之殘賊勢尚猖狂臣等既不敢自分彼此只得分頭發兵先滅重賊兼顧兩路謹將分佈遏要勦賊

情形臣會同將軍臣俄克濟哈合先

題報伏乞

皇上睿鑒全覽施行康熙二十年正月二十日奉
旨兵部知道

報明三路進兵夾勦逆賊疏

密題爲臣等親督官兵破險勦賊救援建昌并留
守犍爲嘉定官兵聲援敘府謹報明情形事竊
臣前與振武將軍臣俄克濟哈統領滿漢官兵
自成都起行至新津因准建威將軍臣佛尼勒
咨移暨總兵李芳述等塘報并各州縣文稟俱
言胡國柱等逆從馬湖渡江欲由沐川司出犍
爲銅河侵犯嘉定峩眉抄敘府後連榮經之賊
等情臣等聞報卽抵夾江分遣官兵於犍爲嘉

定峩眉洪雅銅河新鎮一帶先遏重賊緣由業經

題報在案矣今節據臣前遣去銅河鳳凰村一路總兵副叅段登仕李鍾秀李弘鑒蘇虎仲玉位等前報於鳳凰村稍箕坡兩敗逆賊追至榮經斬殺甚多據生擒逆兵朱維吉等稟稱新鎮有僞沈總兵并冷遊擊有兵三千又供建昌劉將軍差人來在胡將軍這裏請兵等語繼報抵新鎮逆賊果有數千於對河排陣用鎗砲固守官

兵奮勇躡水過河大破逆賊俱各奔入箐林殺死三百餘名生擒六十餘名得獲大砲器械俟查明另報已得新鎮惟是雪山馬匹不能行走請示等情又據總兵李芳述等塘報職等奉文扎犍爲遏賊隨遣發官兵於沐川司而逆賊又復退回今王緒扎豆壩胡國柱過江扎對岸等語又前遣赴建昌總兵毛正義等初稟新鎮守備冷攀龍接誠又報官兵無糧退回等情再據續遣總兵王國臣李應魁及毛正義又報中鎮

殺馬溪難行不能前進又據天全土官高一柱
差人王天培赴建昌引出隨征把總馬應祥稟
稱逆賊又於姜坡添兩座營盤斷左右二所糧
路官兵望大兵救應等語各等情到臣該臣等
看得出犯永寧一路逆賊於瀘州敘府一帶對
江扎營而胡國柱等雖忽出忽退出犯建昌一
路逆賊尚在鴟張又復斷我官兵糧道今賊既
不敢犯嘉眉又銅河沐川司兩路之賊已退而
河水漸長轉盼陰雨則建昌官兵焉能久待是

臣等不得不親身統領官兵破險勦賊救應建
昌緊要除再遣總兵趙名友遊擊吳志帶兵接
應新鎮并飭段登仕等新鎮太平墩兩路官兵
挑選步兵星速前進與建昌通信而李芳述等
官兵不動復撥遊擊屠存義等官兵一千名共
合三千名令李芳述總統扎犍爲以遏賊勢接
應敘府振武將軍量撥滿兵扎嘉定接應犍爲
互相聲援又將邛州官兵俱調至雅州公議振
武將軍臣俄克濟哈統領滿兵走洪雅適榮經

督同總兵偏圖攻取正關又將綠旗漢兵挑選二千名責令副將柴英等走紫眼越關山大象嶺抄出黎州臣同懷忠將軍海潮龍率寧夏總兵趙弘燦自峩眉入山走金口越過關山大象嶺抄出大渡河三路夾攻勦殺出犯之賊奪取象嶺大渡河接應建昌俱於正月二十八日自夾江起行前進外理合

報明伏乞

睿鑒施行康熙二十年二月十七日奉

旨兵部知道

奉遣官兵疑畏不前擒拏正法疏

密題爲奉遣官兵疑畏不前難容驕縱謹報明正
法以振兵心事竊臣自克復徽州畧陽成都以
來官兵勇往投誠効力無不爭先乃自朱衣客
退兵之後人心疑畏投誠觀望臣申嚴訓戒不
啻舌敝慮內防外心血爲盡如建昌隔別數月
相離一千四五百里處處險要俱爲賊踞因遊
擊劉登賢從蠻地前來臣且喜且痛急在遣發
官兵先爲通信臣以投誠總兵給劄副將毛正

義在川日久素有膽勇之名臣不惜厚賞隨給
快騾壯馬各一匹頭銀一百兩復將臣身着袷
衫孫皮褂一件解以付與仍面許如到建昌送
信後卽題實缺更有重賞諄言切囑至再至三
豈期梟弁狼心不改野性難馴不念

朝廷不殺之恩微臣保全之德敢於觀望不前搖惑
兵心如前遣去新鎮乃劉登賢原來之路况又
添兵五百名該弁竟以冷攀龍降賊恐賊尾追
託故不進及臣令走中鎮復添王國臣李應魁

葉自昌張攀鰲王朝幹等官兵共合一千五百
名毛正義仍前逗遛初報路險繼言無糧及至
有糧又言兵丁紛紛亂言大有不妥等語及劉
登賢王朝幹張攀鰲等已經前去而毛正義王
國臣李應魁等竟自撤回又報亂言之兵俱已
脫逃欺公藐玩大干軍紀查係微臣

題明准給副將劄付之員理應請

旨處分但正值進兵而毛正義等如此不前如此惑
衆若不急急正法何以鎮定人心除王國臣李

奏疏存彙 卷之五
應魁係後遣毛成虎等未弁外毛正義當卽擒
拏正法訖相應

報明伏乞

睿鑒施行康熙二十年二月二十九日奉
旨兵部知道

題報建昌官兵自行撤出疏

密題爲報明建昌官兵情形事竊臣等前以出犯
永寧一路逆賊占踞馬湖侵犯嘉定峩眉聞報
統兵卽抵夾江分遣官兵於犍爲嘉定峩眉洪
雅銅河新鎮一帶先遏重賊繼據臣前遣去新
鎮一路總兵副叅段登仕等塘報兩敗逆賊又
據總兵李芳述塘報沐川司之賊復退胡國柱
過江扎對岸而建昌鎮將差員前來報稱逆賊
添兵斷糧新鎮一路官兵報雪山馬匹難進太

平墩一路官兵復以路險不前是以臣等公同商酌於犍爲嘉定添撥滿漢官兵以遏賊勢接應敘府并嚴飭段登仕等新鎮太平兩路官兵挑選步兵星速前去與建昌通信臣與將軍臣俄克濟哈親督官兵分道入山由蠻地前進約期攻取象嶺大渡河接應建昌各緣由俱經題報在案今於本年二月初四日師次黑龍場地方據原遣接應建昌遊擊張攀鰲守備葉白昌王朝幹王恩榮暨劉登賢等報稱卑職等督率

官兵將窄狹處所并殺馬溪偏橋獨石俱已修理前進至雪山地方有建昌撤出先到官兵說稱因城內無糧於正月十九日官兵撤出王總兵等各官兵離殺馬溪尚隔兩天路程後邊逆賊尾追等情到臣臣一面知會將軍臣俄克濟哈一面飭令臣前探官兵適太平墩先撲出犯之賊接濟建昌撤出官兵到日訊明如何撤退緣由方敢入

告今據建昌鎮道王進才傳作楫領兵總兵藍兆周

胡振雄叅遊都守呂自魁馮德昌鄭有榮黃進忠哈蛟龍任定國李一虎李洪王功名等稟稱自總兵朱衣客退兵之後建昌官兵矢志苦守不期逆賊攻圍日甚城內無糧兵心不堅且四下蠻獍俱變又不知援兵遠近遂於本年正月十九日督率全軍突圍而出逆賊尾隨野蠻於險要高山礮石邀截日在接戰行至雪山幸遇接應官兵等語該臣看得建昌守城官兵自朱衣客退兵千里險要俱爲賊踞隔別四月能回

心合力可謂矢志今全師前來尤稱雄健惟是不待援兵自行撤回有棄城不守之罪然皆出微臣力不從心不能急急救應則臣之罪甚於守城官兵矣伏乞

皇上嚴加處分至兩遣通信官兵疑畏不前藐玩已極難容寬貸除將毛正義正法另疏

題明外今建昌官兵旣出逆賊全勢前來應如何
遇要如何破賊臣當與振武將軍臣俄克濟哈
會商題

請遵行謹將建昌官兵自行撤回情形合先

題報伏乞

皇上睿鑒施行康熙二十年二月二十九日奉

旨兵部議奏

協勦官兵屢敗逆賊克捷疏

題爲報明分遣截勦官兵殺敗逆賊克捷情形事

竊照建昌官兵以無糧撤出臣據報當卽入

告其官兵如何退法逆賊如何尾出查明另報及建

昌官兵到齊復據遊擊張攀鰲蘇虎守備葉白

昌王朝幹等稟稱建昌鎮道官兵至雪山前爲

熱水一帶生蠻於險要處所將路挖斷於高山

礮石逆賊隨後尾出見接應官兵生蠻入山逆

賊亦皆退去卑職等卽爲收後前來等情臣與

振武將軍會明正在分佈官兵間接准兵部密咨內開總兵官王用予仍遵前

旨統伊屬官兵速行恢取遵義應請

勅下將軍俄克濟哈佛尼勒趙良棟勦滅侵犯敘府等處逆賊進定雲南之處公同商酌毋失機會而行等因臣以龍塲爲太平墩中鎮一路總要撥留官兵以遏出犯之賊而銅河不獨可出峽眉夾江且通沐川司并適中鎮出大渡河不可不防飭令總兵段登仕等官兵移兵防守要險

接連犄角互相聲援其建昌撤出官兵行令總兵王進才於夾江峩眉兩處分扎一以就糧防守一以休息兵銳整頓器械而關山象嶺有賊雅州最爲緊要准振武將軍咨覆督率滿漢官兵挑挖壕塹立營嚴加固守臣遂親統官兵出茶天岡適嘉定州會勦再查逆渠胡國柱等賊旣踞馬湖豆壩又出沐川司扎莽通壩暨十丈空一帶而我之官兵應如何分頭勦殺以滅重賊隨差員會商建威將軍臣佛尼勒再咨振武

將軍臣俄克濟哈去後隨據總兵李芳述等稟報職等奉遣前去當同漢中副將王化行前往天池探至豆壩見河那邊營盤雖在賊衆似覺無多職等觀看之間有賊營跑來一人名喚曹守太係陝西華州鐵匠隨費總兵營盤做活水寧被擄供稱有王緒黑邦俊在各營拔了六千精兵於二月二十二日從河那邊往馬湖去了說是離馬湖兩天路我兵下有四箇營盤前去堵口子又說去接建昌出來的賊兵要犯嘉定

消息等語職等詳其口供逆賊王緒等來馬湖窺視我兵四箇營盤者料係犍爲四營不可不慮况莽通壩逆賊已扎有營盤又云去接建昌逆賊要犯嘉定俱不可定先將曹守太口供飛具稟聞等情臣隨遣寧夏總兵趙弘燦暨隨征領兵總兵張友成瞿洪陞并副將康調元胡舉桂遊擊顧隆等星馳前去協同原駐犍爲總兵李芳述鄒九疇遊擊屠存義署遊擊陳英等會同協力夾勦又飭現駐銅河總兵段登仕趙名

友副將李鍾秀遊擊李弘鑒吳志蘇虎仲玉位等小心汛守偵探逆賊向往會兵合勦去後隨准建威將軍臣佛尼勒咨開偽將軍胡國柱王緒尤廷玉黑邦俊等於本年二月二十九日夜三更時分上馬湖之路去了本將軍親統官兵於三月初一日清晨自敘府起行酌量追殺賊寇等因臣復飛檄各官兵遵照前行星馳進勦初八日復准將軍臣佛尼勒咨開我親統官兵追賊離馬湖三十里偽將軍胡國柱等親統賊

寇收後與我兵對面站立等語及臣再檄行催總兵李芳述副將康調元遊擊陳英等官兵徑適馬湖協勦總兵趙弘燦張友成鄒九疇瞿洪陞副將胡攀桂遊擊顧隆等官兵抄賊之後夾勦去後而兩准將軍臣佛尼勒咨云我追趕逆賊過馬湖二十五里餘因路甚險窄樹林深大俱是土司地方不便深追撤兵回敘府前去永寧等語又據總兵李芳述等塘報亦稱職等遵奉憲檄由沐川司進莽通壩逆賊下營二座官

奏疏存彙 卷之五
兵一到不敢抵敵退去馬湖一帶逆賊俱去中都建威將軍不會跟賊前來撤兵去永寧職等官兵雖尾後追勦實實兵力單薄等情臣思胡國柱等一起重賊全勢西來而分發協勦官兵既經深入滿洲大兵又東去永寧臣只得親身前去接應仍飛檄該鎮不可以兵單少停况總兵趙弘燦段登仕等兩路官兵俱進本將軍部院亦已前進接應飭行去後三月十八日至西壩據總兵趙弘燦等塘報內稱逆賊由中都走

十丈空俱西行據投出永寧被擄兵丁口供賊內有說要出銅河峩眉去榮經有說到新鎮接應建昌賊兵等語職等已行文段總兵接應火勦惟是山大路狹狡賊叵測處處險要必須重兵防備職等前進之兵似覺力單預爲報明等情臣亦於馬上飛飭嚴加偵探急急前進十九日至象鼻嶺又據總兵趙弘燦鄒九疇副將胡攀桂等差人馳報逆賊大眾已到新鎮發兵出觀音崖三倒拐兩處前來塘馬撒到銅槽子虎

皮岡據鄉民報稱逆賊要出銅河取峩眉夾江
又據投出被擄兵丁供稱逆賊的實要出銅河
走榮經奔象嶺前來係徐李沈三箇總兵後係
王尤二將軍等語祈請發兵前來接應等情臣
一面兼程前進一面飛飭前續遣接應官兵張
攀鰲葉自昌等挑選精健步兵不分晝夜前去
接應二十日又接據總兵趙弘燦段登仕趙名
友鄒九疇瞿洪陞副遊胡攀桂李鍾秀李弘鑿
顧隆吳志蘇虎仲玉位等塘報職等兩路於鳳

凰村會合正議分兵前進聞據前探官兵飛報
兩路逆賊擁出職等卽分佈官兵迎敵逆賊果
敢架山梁而來職等亦將步兵并大砲烏機分
遣於兩山迎戰馬兵居中衝殺步兵連奪兩箇
山頭馬兵直出抄賊之後而逆賊不及停脚且
戰且退職等商議若不乘機追殺恐於險要安
營攻取不易卽嚴督官兵合力攻勦逆賊不能
抵敵仍從兩路退奔職等官兵亦分兩路追進
但前進山勢愈大不知逆賊是何狡謀合將敗

賊情形先爲馳報等情本日亥時又據該鎮將趙弘燦等塘報職等前合兵敗賊於鳳凰村暨後分兵追賊情形已經塘報在案職一路官兵於十四日追賊直抵觀音崖逆賊恃險守要將關口把守官兵難以用力覓鄉民引兵於箐林小路鑽林攀崖而出抄賊之後大敗逆賊除陣斬滾崖三百餘名生擒八十二名內有遵義兵劉元等三十八名倒戈者免死外其餘斬首訖逆賊胡國柱等扎分水嶺止離五里合將官兵



斬關直入情形塘報等情二十一日寅時接據該鎮將段登仕等塘報職等自鳳凰村敗賊尾追於三倒拐連奪險要二處至三道關口兩山壁立箐林深密逆賊於正關蚤已下竹回砌牆拒守職等因見三倒拐地險路狹又係深箐陷泥官兵一退有死無生各官遂身先兵丁自行掌頭子分三股鑽箐攀崖而上大敗逆賊奪取險要斬殺逆賊并滾崖跌死不計其數生擒六十五名斬首訖投出僞都司一員梁天章僞守

備一員趙勝兵三百二十名剃頭安插隨營外除有功官兵以及傷亡官兵并得獲器械查明另報所有殺敗逆賊奪取險要情形理合報聞等情二十二日至燕子坎接據總兵李芳述等塘報內稱逆賊由中都遁去職等一面報聞一面統兵前進探得十丈空有賊營三座查十丈空去中都三十里山路崎嶇兩邊俱是懸崖深箐職等挑弓箭交鎗手步兵一千名砲十位遣發前行職與副將康調元遊擊陳英督率官兵

隨後俱至十丈空連夜砌起土城二座安定營盤十六日攻取但十丈空係一連兩層石崖逆賊居高恃險火器又重我兵難於直上職等卽選精健官兵從箐林抄出逆賊顧後我兵奮勇追上一層其二層逆賊亦不敢守披靡大敗然前路步步皆是險要恐不能刻期攻進有按誠馬邊營提調王承恩引路從石角營翻山可出新鎮侯職等會兵之日另具塘報謹一併報聞等情二十三日稍箕坡接據總兵李芳述趙

弘燦段登仕趙名友張友成瞿洪陞副將胡攀
桂康調元李鍾秀遊擊顧隆吳志陳英暨隨征
僉事道張元凱等塘報職等官兵分路攻險破
賊情形前已具報外今三路官兵於本月十九
日俱出清水河會齊職等公議賊衆兵寡且山
險地狹我等旣已深入必須分佈周詳大家努
力方可破賊遂於二十日各統官兵前用挨牌
馬綿火砲一齊前進而逆賊離新鎮十里地名
黃茅岡箐口倚山下營職等於對面排陣賊兵

不動職等亦以官兵遠涉未去攻賊之營遂整
隊以待之二十一日黎明逆賊僞將軍王緒尤
廷玉王邦圖黑邦俊等掌三筒頭子每一頭子
用三敵直出前來誘戰職等將官兵亦分三股
迎敵兩陣鎗砲如雨互相傷亡甚多賊係拚命
官兵力敵彼此衝殺十餘次直至未時官兵逆
賊俱皆疲乏未分勝負職等遂傳令官兵十分
努力若不努力我等已是深入要想善退萬萬
不能都是該死而官兵一躍奮起精神百倍遂

將逆賊殺敗直追三十里至兩河口天晚逆賊將橋砍斷查陣斬僞總兵一員沈明僞副叅遊守張文祥等三十餘員殺死賊兵以及水溺滾崖約計二千餘名生擒僞叅遊一十一員僞兵二百八十二名俱係拚命死戰之賊當卽問明斬首內冷攀龍原係新鎮復叛守備留候發落得獲馬騾八十五匹賞給當陣傷斃及跌死馬匹兵丁補額外僞印關防三十七顆僞劄一十三張另文齎繳其盛甲器械查明再報投出僞

副總兵一員張文學僞副將一員羅應申僞遊擊一員夏昇僞同知二員王希禹程世培帶兵五百名又救出湖廣江西陝西遵義各處僞兵并瀘永失陷提鎮營兵通共一千三百六十一名瀘永仁合長寧各處難民男婦五百四十二名口遊擊李弘鑒頭中鉛子當陣身亡吳志右腿被箭傷重陳應先左手鉛子打透其餘守千把總以及隨征官員兵丁傷亡甚多并有功人員均俟查明另爲冊報是役也將弁戮力士卒

用命皆賴

朝廷洪福本將軍部院用人養兵所致合將克捷情形先爲飛報至於敗賊奔烟峯雪山我兵裹帶之糧已盡且係生蠻地方不便窮追相應報明等情到臣該臣查看得胡國柱王緒等逆乃出犯瀘州永寧之重賊也前建威將軍臣吳丹失於佈置致兩城被陷全川震動逆賊自此鴟張官兵自此渙散臣憂心切慮不暇他顧者總爲此一股重賊爲患不小故不敢以兩路岐視不

敢以彼此懈心今官兵勇往直前屢敗逆賊追入蠻地而逆賊計窮無路敗遁於自絕之鄉且夕遊魂自此誅滅總皆仰仗我

皇上洪福

國家威靈所致旣據該鎮將塘報前來相應

題報仰慰

聖懷至逆賊潰奔遠近情形暨官兵無糧容臣查明另爲奏

聞謹將分發協勦官兵屢敗逆賊克捷情形合先

題報伏乞

皇上睿鑒施行康熙二十年四月十九日奉
旨覽卿奏遣發官兵進勦逆賊擒斬甚多逆賊胡國
柱等逃遁知道了該部知道

報明官兵無糧撤出銅河疏

題爲窮寇無路已入蠻地協勦官兵無糧難進謹
報明情形仰祈

睿鑒事竊照胡國柱等逆全勢西來臣分遣官兵截
殺屢敗逆賊斬獲情形已經具疏

題報外臣於三月二十五日抵新鎮據總兵李芳
述趙弘燦段登仕趙名友張友成鄒九疇瞿洪
陞副叅遊康調元胡攀桂李鍾秀顧隆陳英等
稟稱職等統領官兵會同敘府滿漢官兵協勦

逆賊初接建威將軍照會令職等來馬湖及職等官兵深入而建威將軍又撤兵東去永寧職等總以

朝廷封疆爲重繼奉本將軍部院屢檄行催且官兵旣已深入敢不努力除殺賊情形前已塘報在案今逆賊已入生蠻地方山勢愈大險要愈多拚命之賊人人俱下死力又與建昌逆賊會合一處難以輕敵又官兵前在嘉定犍爲有支十天五天之糧者有支半月之糧者今追賊將近

一月糧米全無多係尋野菜剝竹芽糊口此一片荒山無田地無人民懇乞本將軍部院日擊請乞速裁職等不敢擅便等語臣查官兵委實無糧所過地方果係一片荒山及再詢前進雪山更出生蠻不毛之地全不種田竊思兵糧乃三軍命脉爲第一首重之事邇來地方官以民逃催呼不應糧米漸次不能接濟如前嘉定發兵時求支二十日裹帶之糧屢催不敷今若再望其肩挑背負遠運於蠻地以供兵食知其斷

斷不能而狡賊斷路拒險處處把守官兵攻取
難期時日臣差人於各營暗加查訪不獨無裹
帶前進之糧卽目前乏食斷餐甚是緊急臣是
以不得不暫令移出銅河就糧一面移商滿洲
兩將軍如何主裁一面咨催督撫如何備糧急
爲進勦另疏題

請臣先將逆賊已入蠻地官兵乏食就糧情形
報明伏乞

皇上睿鑒施行康熙二十年四月二十一日奉

旨該部議奏

攻克關山象嶺捷報疏

題爲官兵仰仗

天威攻克險關奪取象嶺連破逆渠追殺百里直抵
大渡河覆賊全軍謹報明大獲全勝事竊臣前
會同振武將軍紀哈禮遣發滿漢官兵三路進
勦暨臣親身督率緣由已經

題明在案本年五月初八日據前鋒總兵鄒九疇
張友成等報稱初七日兵抵榮經縣逆賊棄城
不守退入箐口站拒險等情又據總兵李芳述

等稟稱洪雅縣無糧等候二日及入山道路狹
隘陡險馬匹難行滿兵存後職率兵前來若分
路走野鴉池出黎州路徑更細問明土著之人
稱說須行十四五日恐不能如約如從黃泥嶺
下土地橋先破正關或再相機不得不稟明請
乞裁奪等情又據總兵王進才等報稱抵秦家
街山路崎嶇官兵俱係步行五姓蠻地似覺兵
單再請添兵接應等情臣見兩路奇兵已遲正
關又不可稍緩除遣副將石福守備葉自昌挑

選強壯步兵五百名前去秦家街尾隨王進才
接應遣總兵李芳述過山適黃泥嶺下黃泥舖
抄出箐口之後令總兵張友成鄒九疇等帶火
器步兵由大路爲前隊副將康調元李九疇呂
自魁等帶馬兵弓箭手爲二隊臣親身督率前
進而山勢狹隘箐林深密一線鳥道官兵俱令
下馬步行將軍臣海潮龍總兵臣偏圖趙弘燦
接續而進逆賊果於箐口站周公橋八方黃泥
舖偏崖連營五處斷橋守險總兵副叅遊守李

芳述鄒九疇張友成瞿洪陞康調元李九疇呂
自魁柴英趙名友吳志蘇虎仲玉位郝俊龍張
攀鰲陳應先李勝鳳劉清劉承富唐希順陳英
李洪孫洪育李一虎等率兵直前其間有正兵
奮勇直入攻進者有奇兵抄後破險者有自山
鑽林直下壓頂者并擒斬逆賊出奇破險次序
情形語繁不敢冗敘有瀆

天聽及抵土地橋見正關三層逆賊密佈鎗砲橋口
兩岸重用柞木竹牌石固伏賊於後臣親督官

兵重披馬綿再用竹挨牌綿簾分左右兩翼派
頭二兩敵仍教以進退接應步法前用烏機百
子砲步步攻進逆賊伏兵率皆纏頭皮盔馬綿
大刀官兵奮勇直前兩陣鎗砲如雨衝殺數次
將賊殺敗連奪柞木石固重墻三道直至橋口
臣見橋下陡險大水洶湧我兵所站兩山俱係
深溝大壑不接關山象嶺輾轉思維若不速攻
大衆官兵屯聚於窄溝山峪中自非久扎對壘
之地若單攻正關不用奇兵不獨地勢險隘難

以用力抑且傷兵損威遂於李芳述鄒九疇兩營川兵中查出引路長毛民供有黃泥舖走山之民劉應素深知山勢隨供從八方後山鑽林砍箐爬崖兩日可出長老坪抄關山之後各鎮將遂舉善走步將遊擊陳應先唐希順陳英挑選便利步兵一千名約定十三日透出長老坪如上路留兵一半預備堵禦象嶺接應之賊帶兵一半從頂直下舉雙砲放起火爲號橋口官兵首尾夾攻十二日攻打竟日賊尚鳩張十三

日再督官兵努力兩山鳥機百子砲齊發逆勢漸挫午時擁過橋口直上攻奪頭層得逆賊西洋紅衣銅砲一位鳥機數門逆賊退上關口猶然死拒申時奪取二層投出僞守備汪才供稱守關係于總兵滿曾楊三副將象嶺頂係戴總兵黎州係蔡總兵楊總兵于總兵係遼東人他說正關如此險要又有紅衣大砲怕甚麼叫他只管來攻實不知大兵如此惡上等語審問間復有跑來投誠僞兵韓文選等四名吐供山上

坐堆子兵傳下跑來賊甚驚慌等語臣卽令官兵努力攻上追殺戍時上頂而陳應先唐希順等官兵透出兩軍截殺逆賊大敗陣斬滾崖無數臣傳令官兵無分晝夜追殺不可少停容賊拆橋守險十四日黎明大敗逆賊於黎州恢城再敗逆賊於漢陽街破其狡謀十五日連戰於大渡河奪其渡口三道而逆賊無路僞副叅遊蘇友直等七十四員僞兵一千六百餘名盡皆倒戈分兵順河復追十里於火場壩山峪中僞

總兵蔡國明戴聖恩于登明事急而降查大象嶺上下六十里偏橋二十餘處逆賊斷橋守險復於黎州合兵排陣惡戰漢陽街伏兵排陣川計大渡河背水排陣拚命餘孽無路死戰官兵深入倍加努力屢戰屢捷大破全軍賊人膽落總皆仰仗我

皇上天威

國家洪福各鎮將奮勇所致也如白箐口站起至大渡河一百四十里大戰四次攻險奪隘九次

共陣斬生擒逆賊四千餘名滾崖落水不計其數得獲馬騾八百餘匹七尺西洋紅衣銅砲二位鳥機百子砲四十餘門綿甲皮盔交鎗大刀器械甚多所有攻險破陣有功官兵傷亡官兵及僞官印劄容臣查明另疏

題報又象嶺六十里陡險山路官兵馬匹損傷四五得獲逆賊馬騾俱令補額倒戈僞官僞兵原騎馬騾仍給本人以安其心合併敘明僞總兵蔡國明戴聖恩于登明事急而降原非真心投

誠理當正法惟是雲南未下建昌現有兩路重賊臣仰體

皇上好生寬仁暫令剃髮安插并陣擒未弁僞兵俱行寬釋伏乞

皇上允臣所請以廣招徠再雅州榮經至黎州皆大山深箐羊腸鳥道不能施馬原議綠旗步兵火器在前滿洲隨後接應而臣長驅直入者所賴滿洲官兵大振軍聲也今先鋒官兵明甲官兵副都統叅贊臣希福將軍臣紀哈禮挨次接應

奏疏存彙 卷之五
俱到臣叩懇

聖明准照滿洲例議敘應聽將軍臣紀哈禮開報至
大渡河水勢洶湧如何過渡前進現在佈置兵
食爲重裹帶之糧已盡繼運之糧不到而黎州
所一線之地百姓寥寥田地無幾素不產糧且
經逆賊蹂躪日久率皆逃避兩山苗蠻不毛之
地不但無糧可尋抑且不便入山尋糧臣焦心
如焚急等星火又不得不據實

奏明仰懇

電照緣係恭報官兵大獲全勝事理相應統敘

題明貼黃難盡伏乞

皇上睿鑒全覽施行康熙二十年六月十二日奉
旨據奏率領官兵擊敗賊衆已抵大渡河知道了餘
着速議具奏該部知道

報明官兵渡江前進疏

密題爲官兵渡江守要急催前進裹帶乏糧謹報
明情形仰慰

聖懷事竊臣督率官兵攻取關山象嶺克復黎州直
抵大渡河立破賊衆盡皆倒戈克捷情形已經
題報在案而臣以奪取渡口守曬經關爲要是以
追賊緊急不容過渡守險官兵仰仗我

皇上天威

國家洪福覆賊全軍匹馬不能免脫此從來罕有

之事罕聞之捷也查渡船三隻一隻損壞二隻可渡然每船止可渡馬十餘匹若渡步人可渡兵三十名河水洶湧兩岸陡險每日止兩渡便晚自二十一日得船渡起官兵十渡其三曬經關已經挑壕安營固守是渡口無慮矣又海棠已經恢復再遣官兵前去越嵩衛偵探聞賊於象嶺銅槽盧沽寧番一帶守險據僞總兵蔡國明于登明戴聖恩等稟說逆賊僞將軍胡國柱尤廷玉王邦圖黑邦俊劉沛武王公良王屏翰

統兩路賊兵尚有二萬俱在建昌餘丁家口尚多地方饑饉米賣二兩一斗其王緒李匡帶兵四千去金沙江聞金沙江無船復回等語臣思兩路重賊會合一處勢力自大不可不備然我兵直入覆賊全軍聲勢不小俟官兵過渡一半臣卽當督兵前進惟是前報雅州無糧官兵裹帶之糧不多今已斷糧過期數日再如黎州較關山象嶺箐林漸滅山勢漸闊然仍在深山窮谷之中苗蠻不毛之地無多民無多田實實無

糧官兵待食甚急繼運之糧不到臣焦心如焚
除遣營官守催外謹將官兵渡江守要暨發兵
前探情形并候糧緣由先爲

報明仰慰

聖懷伏乞

皇上睿鑒施行康熙二十年六月十八日奉

旨該部議奏

督率渡河官兵先行進勦疏

題爲再報官兵前進恢城逆賊狡情叵測臣等督
兵繼進仰慰

聖懷事竊照官兵直抵大渡河覆賊全軍奪其渡口
船隻過江守曬經關并恢取海棠偵探越嵩衛
情形經臣題

報在案嗣據前探官兵初報逆渠胡國柱統兵前來
堵江尤廷玉已扎盧沽再報僞總兵安民賀逢
泰守越嵩堵小象嶺臣飛檄總兵李芳述鄒九

疇張友成瞿洪陞副叅遊守康調元李九疇呂
自魁趙元輔柴英吳志張攀鰲郝俊龍蘇虎仲
玉位劉承富唐希順李洪孫洪育陳英等統領
先鋒頭敵官兵前進再遣總兵偏圖等會同滿
洲先鋒接應仍申嚴須要步步爲家得一處守
一處不可輕忽不可遲疑不時馳報臣會同將
軍臣紀哈禮將渡船二隻滿漢各分一隻督兵
急急渡江奈兵多船少水勢洶湧在前每日止
過兩渡卽便天晚今加兵設法一日可過五六

渡或七八渡不等然終以船少每一日渡馬則
不過二三百匹渡人則不過七八百名今據總
兵李芳述等塘報逆賊安民賀逢泰已經敗遁
恢復越嶲衛城尤廷玉尙在盧沽胡國柱出建
昌王緒李匡不曾渡金沙江仍復轉回雖守備
田國鳳前來投誠請兵云賊已出建昌然疫情
叵測不敢深信職等已議令總兵瞿洪陞守備
李洪挑選精健馬步官兵一千前往偵探職等
固守越嶲衛又分兵於寧番一路猓猓溝小道

一路聲勢謹將情形報明并送投誠偽叅遊柴
飛虎姚思文黃錫雲等同偽改衛爲州改所爲
縣各官及偽印偽劄呈繳請示遵行等情到臣
臣思官兵旣抵越嶲衛理宜前進而瞿洪陞一
千官兵深入似覺兵單卽再飛檄各官留一鎮
守越嶲衛其餘官兵當速速接續瞿洪陞等官
兵前進不可遲緩臣復會將軍臣紀哈禮副都
統叅贊臣西布公議若候大兵過完一齊前進
尙須二十餘日恐難等待臣等遂將已經過江

滿漢官兵督率先行前進接應而未經過江滿
漢官兵尚多責令該管章京將弁挨次過江隨
過隨行至臣等前進逆渠或戰或守或奔逃容
臣等相機調度務期破賊所有前發官兵恢城
前進情形暨臣等督率過江官兵先行緣由理
合先爲

題報伏乞

皇上睿鑒施行康熙二十年六月二十九日奉
旨兵部知道

再復建昌捷報疏

題爲官兵仰仗

天威立破險關覆賊全軍逆渠聞風喪膽奔潰謹報
明復取建昌再定全川仰慰

聖懷事案照前據總兵李芳述等塘報恢復越雋守
城公議總兵瞿洪陞守備李洪等帶兵一千名
偵探臣飛檄李芳述等留一鎮守城其餘官兵
速速接續前進不得遲緩再會同將軍臣紀哈
禮將已經過江官兵臣等督率先行接應務期

破賊緣由業經

題明今於本月十一日抵平壩接據總兵李芳述等塘報據總兵瞿洪陞守備李洪報稱職等帶兵於本月初四日抵禮州地方有建昌差來投誠官劉大貴金相龍等迎接稟稱逆賊於十九日聞得大兵攻開關山將蔡于戴三箇總兵并賊兵數千俱行殺散投降一箇不能跑脫甚是驚懼尤廷玉卽來禮州胡國柱初傳統兵去大渡河堵小象嶺後見兵抵越嵩衛賀總兵敗回

將賀總兵絞死於盧沽殺楊總兵在禮州胡國柱二十二日先走王公良王屏翰二十四日後走尤廷玉收後將建昌搶掠從會川而去聞說金沙江不能過渡王緒李匡尚在江邊賊兵到處搶掠總因前自新鎮敗回走蠻地賊兵十分狼狽什物盈甲大半皆丟棄恐過金沙江自必各自逃散等語又云各山苗蠻四起擾亂地方建昌兵民望大兵急救職等於初五日已抵建昌城外扎營請稟將軍部院示下等情到職擬

合轉報等情十四日又據總兵李芳述鄒九疇張友成副叅遊守呂自魁李九疇趙元輔唐希順孫洪育等塘報職等同瞿總兵前後追賊恢復越嵩冕山二營禮州各所建昌地方得獲紅衣大砲三位大砲八位九子砲六十五位鳥機四十二門以及砲車火藥火罐鉛子等項并投降跟砲叅將王琰守備高應秋池顯名李應召林果動祁安邦等帶護砲兵六百餘名暨追獲皮盔綿甲副刀交鎗什物甚多俱俟查明另爲

冊報職等於初十日抵建昌官兵士民吐供逆賊奔逃與前報無異總兵瞿洪陞等遣兵至金川橋逆賊將橋用火燒燬據本地官民供稱此橋須用人夫千名以及物料必須一月方能搭造等語又據自會川奔回建昌營千總魯之彥稟稱王緒李匡於二十一日方自紅布所迤于小渡過江胡國柱二十七日自會川起行王公良尤廷玉於六月初一日起行俱奔紅布所迤于渡聞要去姚安之信羽林將軍王邦圖已死

兵皆大亂人心不一又問金川橋旣燒汝從何來據供我從下首用四兩銀子僱蠻子的筏子方渡我前來等語職等伏思官兵前自雅州馬兵裹帶糧米二十日步兵裹帶糧米十五日自攻取關山象嶺克復黎州進取建昌已逾一月有餘食米全無甚是緊急似此一片荒山無糧可尋懇乞蚤爲佈置接濟今官兵仰遵本將軍部院入川之令不敢進城止量派官兵守城守門外其餘大衆官兵同職等俱扎營於呂俊坡

城外聽候示下遵行合先塘報等情該臣看得官兵仰仗我

皇上洪福

國家威靈飛渡三江直下成都永寧賊遁建昌就撫而僞將軍撫鎮司道大小文武千有餘員遠近響應獻地獻城又雲南僞將軍海潮龍來歸迤西北勝州一帶剃髮僞總兵葛鳴鸞等僞道府高翮映夏長庚等繳印繳劄進學張國柱等納款貴州水西土司安勝祖阿烏等兩次差

人請兵不獨四川底定而且雲貴事機可乘八
九乃爲悍臣要挾惑亂接事者又復私心弄巧
再加庸鎮退兵奔遁將千里之險盡棄與賊以
致雲南已降者又復中變四川已定者幾不可
問而臣一身一心安內防外期以身殉東奔西
馳兼顧兩路數月以來心血已枯人力用盡今
幸兩敗逆賊於鴟張之際復土恢疆於萬險之
中總皆我

皇上洪福齊天滿漢官兵倍加努力今各官報稱逆
賊大潰奔逃料難復行糾合狂逞是四川兩路
重賊不復慮矣惟是兵貴神速理當急進但兵
糧爲要馬力當先又不可不備容臣到建之日
會同將軍臣紀哈禮查其地方酌其馬力并候
繼運之糧另疏題

請所有各官報到恢復建昌等城并賊潰奔逃情形
合當先爲報明今臣會同將軍臣紀哈禮叅贊
臣西布具

題緣係報明進勦恢城事理貼黃難盡伏乞

皇上睿鑒全覽施行康熙二十年七月十四日奉
旨據奏官兵進勦逆賊胡國柱等潰奔恢復建昌城
池知道了該部知道

懇請另簡督臣疏

題爲敬陳愚忠仰祈

睿鑒以重巖疆从安長治事臣查雲南極邊重地萬
里遐荒猥伸苗蠻輕生好殺古稱難治且界連
交緬若非重臣假以權便不能警服歷代創制
可考也如總督統轄兩省節制文武權重任重
尤須才望勲舊方克勝任臣本西鄙漢人不學
武夫不獨望輕才淺抑且年衰有病臣謹據實
敬陳伏候

聖明睿裁或將邊遠重地專

命勲臣世守或仍用總督叩懇別

簡才望有素之人令其赴任會同大將軍撫安地方

蚤定人心至臣不敢辭領兵之責仍以將軍帶

領原統一路漢兵進定雲南事平撤回准照年

老例休致庶巖疆可期久安長治而臣一腔報

國之悃忱得以彰明身安而心亦安矣伏乞

皇上鑒臣愚忠出自至誠俯

允採納施行

題報身到建昌遣發官兵疏

題爲恭報微臣到建日期遣發官兵前進并陳糧
餉馬匹地方情形仰祈

睿鑒事竊照臣等渡江統兵先行暨接據總兵李芳
述等塘報兵抵建昌恢復城池經臣兩疏

題明在案今臣於六月二十二日到建昌二十四
日會同振武將軍臣紀哈禮進城安民訖如逆
賊奔潰及燒燬金川橋備述前疏不敢再爲冗
陳而臣於途次飛檄各官分遣官兵偵探并修

搭橋梁再行總兵偏圖接續前進據報已遣隨
征領兵遊擊李勝鳳仲玉位帶兵偵探并修搭
浮橋尚未報到而官兵無糧乏食十分緊急等
情臣查建昌處萬山蠻彝之中兩省邊遠不接
之地承平無事之時尚須強兵良將方可控制
况孤城从爲逆賊蹂躪臨行又復搶掠苗蠻附
合作亂不獨拉扯子女燒拷有家卽糧米牲畜
搜刮殆盡而田地荒蕪十無一二成熟卽一二
成熟中又值天災生蟲秋成無望臣見老幼扶

病鶉衣菜色實不堪命是建昌無糧不能應急
可知矣而繼運之糧不接再查各官兵前自雅
州裹帶二十日之糧今已逾四十餘日是三軍
乏食又大可慮矣又兵餉壓欠六箇月馬匹自
攻取關山直進建昌損傷滿兵過於漢兵除官
兵糧餉馬匹形狀苗蠻觀望俟容臣等另疏備
述指陳今以進定雲南爲急要先於前到官兵
中挑選漢兵三千名滿兵三百名各帶那奏糧
十日責令總兵偏圖統領會同先鋒章京前進

臣等立候繼運之糧并行建昌道於寧番德昌打冲鹽井各處勸民那湊召買再查建昌去雲南尚有十八站行兵須一月原

題定裹帶米二十日今不敢望二十日若得十餘日之糧隨得隨行陸續起發所有臣等到建日期及地方情形并遣發官兵無糧緣由臣會同將軍臣紀哈禮副都統叅贊臣西布先爲題報再將軍臣海潮龍請願前導已令會同總兵偏圖進發統爲敘明貼黃難盡仰祈

睿鑒全覽施行康熙二十年七月二十三日奉
旨該部議奏

親身督兵先進大衆候糧疏

題爲官兵無糧難以前進事關緊急臣量帶官兵
先行謹報明情形仰祈

睿鑒事竊照官兵抵建無糧先遣三千員名那奏裏
帶糧十日前進臣等立候繼運及召買陸續發
兵前進緣由具題

報明在案臣原期繼運之糧接續前來并建昌道勸
諭召買之糧幫協每日期收四五百石半放日
糧半積裹帶孰料繼運遲滯召買艱難今據該

道開報繼運之米日收或二三十石或四五十石不等召買亦不過五六十石查滿漢官兵日支須糧五百石除去前遣以及在後未到官兵卽在建滿漢官兵亦日須口糧三百餘石而每日所收糧米通計不過百石日給不敷安能望有裹帶臣若候糧等兵期於萬全而進又似雅州之榜樣終不能進兵矣臣輾轉思維雲南未下今胡國柱王公良又復前去雖胡國柱屢經敗遁狼狽竄逃王公良全軍覆沒於大渡河亦

喪膽奔遁火砲什物盡棄決難再整料其自不敢向雲南省城矣然餘孽尚多在我川省兩路進勦官兵理勢難緩臣日夕焦心如焚如灼刻圖前進實難候糧以致稽延只得量帶官兵親身先行今於七月初六日自建昌起行進發其各鎮營官兵留後等候裹帶之糧陸續前來所有微臣自建起行日期并官兵乏糧緣由理合報明伏乞

睿鑒施行康熙二十年八月初一日奉

旨該部知道

報明入滇日期疏

題爲恭報微臣抵江入滇日期并陳河水暴發逆渠敗遁情形仰祈

睿鑒事竊照臣前遣發官兵及臣繼進并胡國柱王公良等逆敗遁緣由兩經

題明在案不期七月一月大雨如注山河水發過渡甚難今臣於七月二十一日抵江邑已入滇境二十二日至金沙江兒河水洶湧前遣官兵尙在江岸扎營河下止有舊損松木板船二隻

奏疏存彙 卷之五
一隻已被暴水打壞一隻止可渡馬七八匹又
官兵自建昌裹帶糧米十日今已二十餘日兵
食尤出緊急今雖急在催糧催船恐緩不及事
卽欲設法過渡而江水暴發筏子皮袋俱不能
用臣焦心如焚只得稍候天晴另爲躡渡過江
先行赴省所有應行事宜俟臣抵省之日另疏
題

請軍機聽大將軍指示至胡國柱王公良等逆奔散
已經瓦解雲南孤城焉能久持逆孽吳世璠郭

壯圖釜底之魚滅在旦夕指日可奏蕩平矣今
將微臣入滇日期先爲

題報伏乞

睿鑒施行

奏疏存藁

卷之五

六

奏疏存藁卷之五終

